

陳子奇先生墓誌銘

予少耳同里子奇先生名知爲儒林丈人輩未究也長與先生
子澐波紋波金波遊甚密漸熟其事實金波受學於予來乞銘
墓文予不敢辭爰筆而載之曰

嶽嶽陳公里鄙矜式諱曰發蓮子奇其字厥考彥卿談則妣氏
舉男子二公其伯子生有異稟才力凌駕蠟鳳心靈食牛氣大
軀幹魁偉玉立長身神采所映峯峙淵澄入塾讀書絕景馳馬
同人視之其才盡下經史子集撐腸柱肚融爲芳液時時一吐
下筆爲文長老皆驚泉源萬斛奔雷走霆制舉有作笙簧雅奏

官樣新艷曉花酣露鏤金賦麗事鉢詩催春榮日明萬花齊開
試場角藝輒冠其偶補弟子員在泮飲酒仰眎青雲僉曰不遠
先生曰否道在實踐文行並著聞望噪甚有司舉之冊其優行
棘闈報罷益發羣書簡練揣摩枕藉以其餘力効法陶朱
疊致千金百產精儲因思才人恆多不遇文章憎命長年顛蹶
劉蕡下第東野枯吟窮愁衰老孑孓伶仃荒山老屋人悲鬼嘯
濁酒澆胸仰天大叫精神意志銷磨何有遺書數卷或傳或否
如公遭際天下承平家世全盛心舒氣伸以其才華副之年命
鸞臺麟閣眄睠匪峻而乃造物不相假借玉樹徂春金刀掩夜

天葩揚芬嚴霜實之神驥展足懸崖窘之才與壽仇誰其忖之
臨文嘅嘆涕旣隕之道光壬寅是歲公生維秋九月念七日辰
迄乎辛巳行年四十歿於九月二十九日古人有云鬱者必亨
不于其身于其子孫珠樹四枝臨風振采縱其所至金鵝擘海
一枝早折公哭之慟三子者才翱翔薛鳳孫枝秀發華實离离
頭角崢嶸嗟吁麟兮德配歐陽皚皚白髮芝蘭秀繞神明煥發
公顧厥後可以無憂我銘公墓其辭不浮崇山嵯峨豐碑屹立
世世不磨以表馨逸

中華民國八年己未秋八月里後學凌盛鳴光午氏謹撰